

CYFARFOD	Pwyllgor Ymgynghorol Harbwr Aberdyfi
DYDDIAD	17 Hydref 2023
TEITL	Diweddariad ar Faterion Rheoli'r Harbwr
AWDUR	Uwch Swyddog Harbyrau

1. Cyflwyniad.

- 1.1 Prif swyddogaeth y Pwyllgor yw ystyried, trafod a chynghori ar faterion sy'n ymwneud â rheoli, diogelu a datblygu'r Harbwr a derbyn sylwadau'r Aelodau ar faterion sy'n ymwneud â Harbwr Aberdyfi.
- 1.2 Diben yr adroddiad hwn yw rhoi diweddariad bras i'r Pwyllgor ar faterion yr harbwr ar gyfer y cyfnod rhwng mis Mawrth 2023 a mis Hydref 2023, er mwyn derbyn adborth gan yr aelodau ar faterion diogelwch a materion gweithredol yr Harbwr.
- 1.3 Sefydlwyd Pwyllgorau Harbwr Abermaw, Aberdyfi a Phwllheli dan adran 102(4) Deddf Llywodraeth Leol 1972. Mae Pwyllgor Harbwr Porthmadog yn Bwyllgor Harbwr statudol, a sefydlwyd yn unol ag Adran 6(2) (a-j) Gorchymyn Addasu Harbwr Porthmadog 1998.

2. Angorfeydd Aberdyfi a Chofrestru Cychod.

- 2.1 Mae 73 o gychod wedi bod ar angorfeydd blynyddol yn harbwr Aberdyfi yn 2023. Mae hyn yn cymharu â 72 o gychod ar angorfeydd yn 2022.
- 2.2 Mae nifer y cwsmeriaid angori yn harbwr Aberdyfi wedi aros bron yr un fath a'r llynedd, heblaw am gynnydd o un cwsmer ychwanegol. Gobeithir y bydd y cynnydd yma yn parhau yn 2024. Mae'r sefyllfa economaidd gyffredinol ac yn benodol, y costau byw presennol, yn dal i fod yn ffactor wrth ddenu cwsmeriaid i'r harbwr.
- 2.3 Gyda nifer fechan o eithriadau, mae'r rhan fwyaf o'r cyhoedd sy'n dymuno lansio cychod pŵer i ddyfroedd Arfordir Gwynedd bellach yn cofrestru eu cychod pŵer ar-lein, drwy wefan Cyngor Gwynedd. Yn cynnwys y rhai a gofrestrodd ar bapur, cofrestrwyd 1269 o gychod pŵer a 1240 o fadau dŵr personol yng Ngwynedd y tymor hwn.

3. Cod Diogelwch Morol Porthladdoedd.

- 3.1 Mae'r Cod Diogelwch Morol Porthladdoedd (PMSC) yn amlinellu'r safon genedlaethol ar gyfer pob agwedd o ddiogelwch morol porthladdoedd. Ei nod yw gwella diogelwch i bawb sy'n defnyddio neu'n gweithio yn amgylchedd morol porthladdoedd. Mae'n berthnasol i bob Awdurdod Harbwr Statudol.

Mae'r Cod yn cynrychioli arfer dda a gydnabyddir gan ystod eang o ran-ddeiliaid yn y diwydiant ac mae Cyngor Gwynedd yn deall y gall peidio â chadw at arfer dda fod yn arwydd o awdurdod harbwr sy'n torri dyletswyddau cyfreithiol penodol.

- 3.2 Mae'r Gwasanaeth yn adolygu'r Cod Diogelwch Morol yn rheolaidd ar gyfer yr harbyrau dan ei awdurdodaeth er mwyn sicrhau ei fod yn parhau i gydymffurfio'n llawn â gofynion presennol y Cod. Fel rhan o'r broses adolygu, mae'n angenrheidiol derbyn sylwadau a barn Aelodau'r Pwyllgor Ymgynghorol ar ba mor addas yw'r Cod Diogelwch Morol ac i dderbyn sylwadau'n rheolaidd ar ei gynnwys, gan gyfeirio'n benodol at weithgarwch yr harbwr, cymhorthion mordwyo, addasrwydd is-ddeddfau, materion diogelwch a'r gwaith dydd-i-ddydd cyffredinol yn Harbwr Aberdyfi.

4. Materion Staffio.

- 4.1 Nid yw'r lefel staffio yn harbwr Aberdyfi wedi newid ers yr adroddiad diwethaf i'r Pwyllgor, gyda'r Harbwrfeistr, Mr William Stockford, yn cael ei gefnogi gan ei gymhorthydd, Mr Oli Simmons. Yn ystod beth fu'n haf prysur, mae staff yr harbwr hefyd wedi cynorthwyo ac wedi gweithio gyda staff yn Nhywyn, harbwr Abermaw ac ar y traeth ym Morfa Bychan.
- 4.1 Mae'r Gwasanaeth hefyd yn gallu galw ar staff sydd wedi'u lleoli yn harbyrau Abermaw a Phorthmadog i gynorthwyo gydag unrhyw waith yn harbwr Aberdyfi os oes angen.
- 4.2.1 Mae'r Gwasanaeth yn werthfawrogol iawn o'r gwaith a wnaed gan y wardeiniaid traeth tymhorol fu'n gweithio yn Aberdyfi a Thywyn drwy gydol yr haf prysur.

5. Materion Ariannol.

- 5.1 Bydd y Prif Swyddog Morwrol yn darparu crynodeb bras o gyllideb yr harbwr a'r sefyllfa ariannol bresennol hyd at ddiwedd y chwarter.
- 5.2 Yn ystod y cyfnod hwn bu rhaid ymrwymo adnoddau ariannol ar gyfer yr hyn a ganlyn;
- Cynnal a chadw cymhorthion mordwyo a goleufeydd
 - Prynu a chynnal a chadw offer a chyfarpar yr harbwr
 - Archwilio a chynnal a chadw angorfeydd y Cyngor
 - Cynnal a chadw a gweithredu cwch patrôl Powercat yr Harbwr, gan gynnwys Buddsoddiad i gynnal a chadw'r cwch er mwyn cydymffurfio â gofynion Cod Ymarfer yr Awdurdod Morwrol a Gwylwyr y Glannau.
 - Cynnal a chadw tiroedd a meinciau
- 5.3 **Ffioedd a Thaliadau. 2024/25.**

O ran y ffioedd a thaliadau arfaethedig ar gyfer Harbwr Aberdyfi, ynghyd â'r ffioedd lansio ar gyfer Cychod Pŵer a Badau Dŵr Personol ar gyfer tymor 2024/25, o'r blaen mae'r Gwasanaeth wedi addasu'r ffioedd yn unol â'r gyfradd chwyddiant ar y pryd. Fodd bynnag, hyd yma, ni wnaed unrhyw benderfyniad ynghylch lefel y ffioedd ar gyfer y tymor nesaf.

6. **Adroddiad yr Harbwrfeistr.** Bydd Harbwrfeistr Aberdyfi yn darparu crynodeb o'r materion Mordwyo a Gweithredol a wnaed ac a brofwyd yn y cyfnod rhwng mis Mawrth 2023 a mis Hydref 2023, gan gynnwys materion cynnal a chadw. Mae copi o'i adroddiad ynghlwm.